

28.2978 in 5647

LETTRE

ESCRITE

PAR

VN PERE IESVITE

A VN

GRAND PRELAT,

E.

SVR LE SVIET DE LA

2150.

procedure faite par les Officiers de
Monseigneur l'Euesque d'Amiens,
contre les Peres Iesuites de la mesme
Ville.

2271
68
132
252
222
152
002
246



LETTRE

ESCRITE

PAR

M. PIERRE DESCHAMPS

A VII

GRAND PRINCE

DE L'ORIENT

PARIS

DE L'IMPRIMERIE

DE LA CITÉ

DE LA CITÉ

DE LA CITÉ

DE LA CITÉ

DE LA CITÉ

DE LA CITÉ

DE LA CITÉ

DE LA CITÉ

DE LA CITÉ

DE LA CITÉ

DE LA CITÉ

DE LA CITÉ

DE LA CITÉ

DE LA CITÉ

DE LA CITÉ



LETTRE

ESCRITE

PAR VN PERE IESVITE

à vn grand Prelat,

SVR LE SVIET DE LA

*procedure faicte par les Officiers de
Monseigneur l'Euesque d'Amiens,
contre les Peres Iesuites de la mes-
me ville.*

MONSEIGNEVR,

Ce n'est pas vne des moindres
graces que la sincerité de mon hu-
neur me fasse tenir de vous, que
de m'auoir authorisé dans vostre
estime pour homme certain en ses
paroles, & qui ne peut trahir la ve-

A ij

rité. Je seray ialoux de conseruer
cette gloire tant que vous me lair-
rez la liberté de traicter avecque
vous, que ie cognois pour ennemy
declare de l'artifice & de tout dé-
guisement; Et puisque vous auez
faict choix de ma personne, ainsi
que vous m'auetz dit, pour en tirer
instruction sur toutes les circon-
stāces du procès que Monseigneur
l'Euesque d'Amiens a intenté con-
tre nostre Compagnie, ie vous
promets de ne point tromper la
confiance que vous voulez pren-
dre en moy, & me tenant dans le
tres-humble respect que vous m'a-
uez veu tousiours auoir pour ce di-
uin Caractere, qui vous a mis
vous & luy dans le rang des Peres
& des Princes de l'Eglise; ie m'en-
gage à vous raconter au vray tout
ce qui s'est passé dans cette affaire,
dont i'ay vne entiere cognoissance.

Vous sçavez donc, MONSIEUR, que la premiere cause de la contestation qui s'est meüe entre ce Prelat & nous, ne procede ny d'aucune ancienne auersion qu'il ait euë pour les Iesuites, ny d'aucun manquement de nostre part au respect que nous deuons à sa personne, & à son eminente dignité. Il nous a honorez assez long temps de sa bienueillance, & nous nous sommes efforcez par nos seruices de n'en estre pas ingrats. Mais il s'est trouué des hommes animez de passion contre nous, qui s'estant glissez dans sa maison, & s'estant acquis quelque credit sur son esprit par vne apparente pieté, l'ont attiré dans les sentimens d'aigreur où ils s'estoient engagez, & n'ont point cessé qu'ils ne luy ayent persuadé que nostre totale ruine estoit necessaire au bien public.

Les sieurs Labadie & Dabillon
 congediez & retranchez de nostre
 Corps, sur les iustes presomptions
 qu'on auoit de leur mauuaise con-
 duite, à raison de leurs maximes
 dangereuses, qui ne visoient pas
 à moins qu'à establir des reforma-
 tions imaginaires dans l'Eglise,
 comme l'euenement l'a faict voir
 en diuerfes rencontres, cherchant
 vn azyle & vn port en leur nau-
 frage où ils se pûssent ranger en
 seureté, le trouuerent dans la faci-
 lité de ce Seigneur qui les recueillit
 en sa maison.

Labadie estoit sorty le premier
 de nostre College de Bordeaux,
 ieune homme qui brusloit d'impat-
 tience de monter dans les Chaires,
 où nous ne iugions pas à propos
 de le produire, pour n'auoir ny
 l'humilité ny la science requise en
 ce Ministère, mais seulement beau-

coup de presumption, & peu de capacité. Il vint à Paris à dessein de se monstrier sur ce theatre où il auoit tant affecté de paroistre, & où il se promettoit de faire bruit, & en effet il commença d'y debiter vne doctrine nouuelle, fondée sur des principes particuliers, tous propres à troubler les esprits foibles. Mais les Officiers de Monseigneur l'Archeuesque vigilants à leur deuoir, & estant informez de bonne part des humeurs de ce beau Predicateur, ne tarderent point à l'interdire de la Chaire & de l'exercice de sa fonction dans le Diocese.

Il ne perdit pas courage pour se voir atterré dès la premiere rencontre. Il crût que l'opposition qu'on formoit à ses desseins estoit vne contradiction à l'Euangile, & vne espreuve de Dieu. Il dit à ses confidens que les commencemēs

des grandes entreprises estoient
 tousiours difficiles. Il tire surcroy
 de forces de son abbattement, &
 mendiant de la faueur où il peut, il
 fait ses plus grands efforts pour
 rentrer dans les droicts de sa Mis-
 sion pretendue, qu'il disoit tenir
 du saint Esprit, & ne pouuoir luy
 estre contestée. Il ne gagna rien
 pourtant, & quelque sollicitation
 qu'il employast, il ne pût se faire
 restablir. Ainsi perdant l'esperan-
 ce de pouuoir conuertir Paris qu'il
 trouuoit si rebelle à ses lumieres; il
 tourna ses pensées sur la Picardie,
 où les esprits sont tenus assez do-
 ciles. Le sieur Mester qui s'estoit
 acquis vne grande autorité d'hō-
 me Euangelique dans Amiens, luy
 donna des lettres de faueur, & sur
 la recommandation de ce person-
 nage, il fut receu comme vn nou-
 uel Apostre en cette ville, & y eut

employ de Monseigneur, qui le fit
prescher dedans les meilleures
Chaires.

Il y parut avec beaucoup d'ap-
plaudissement du petit peuple, &
alors, soit qu'il ne se sentist pas as-
sez fort pour soustenir tout seul le
faix de son entreprise, ou qu'il vou-
lust en partager la gloire avec son
ancien amy qu'il auoit fait son di-
sciple, il pratiqua si bien par de se-
crettes menées le sieur Dabillon,
qui estoit encore à Bordeaux avec
nostre habit, qu'il le luy fit quitter
d'assez mauuaise façon, & non pour
autre suiet que pour aller ioindre
son maistre en Picardie.

Cette vnion les rendit forts l'un
& l'autre, elle leur accrût le don de
langue, ils se voyent dans la liber-
té du monde qu'ils auoient fort
souhaitée, francs du ioug de Re-
ligion qui les auoit trop long tēps

incommodez , en estat de pratiquer vn exercice qu'ils n'eussent pas fait chez nous, soustenus de la faueur d'un Prelat qui les croit tres sçauans & tres-pieux , comme estant sortis d'un Ordre où il y a trop d'ignorance, & trop peu de pieté pour des ames si choisies que les leurs; & dans cette vogue fauorable, vous ne sçauriez vous imaginer , MONSEIGNEUR , avec quelle hardiesse, pour ne pas dire insolence, de peur de sembler iniurieux, ils se mirent tous deux à publier leur doctrine, laquelle ils ne doutoient point de confesser estre nouuelle, puis qu'ils protestoient en pleine Chaire à ces bons peuples , que depuis soixante ans & dauantage nul autre Predicateur ne leur auoit annoncé la verité.

Il me souuiendra tousiours d'une parole que vous me distes vn iour

sur le recit qu'on vous faisoit du grand succès en faict de predication, qu'ont accoustumé d'auoir pour quelque temps semblables petits causeurs qui sont sortis de chez nous pour parler tout à leur aise : Que c'estoient des oiseaux melancholiques, qui ne sonnoient mot en cage, & qui recouuroient le chant avecque la liberté. Vn innocent qui se trouua là present voulant l'encherir sur vous par vne naïueté ridicule, adiousta de l'abondance de ses recueils, Que c'estoient des grenouilles de Cirene, qui dans leur pays estoient muettes, mais estant transportées dans vne contrée estrangere trouuoient le don de la voix; quelquesfois plus resonante, mais aussi plus importune, que les autres ne l'ont pour l'ordinaire.

Ces deux hommes deuenus Pre-

dicateurs en vne nuit, firent si bié profiter leur grand talent, qu'ils mirent toutes les familles en diuision, les consciences en trouble, les Ecclesiastiques en zele amer tendant à faire des sectes, & les artisans avec leurs femmes en humeur de se passer Docteurs dans le traicté de la Predestination. Je ne vous dy rien, MONSIEUR, qui n'ait esté: Vous sçauéz les mouuemens des peuples, & comme il faut peu de poudre pour leur donner vn grand feu. Je vous laisse à penser s'il ne faisoit pas beau voir de simples femmes qui disputoient de la grace en maniant l'aiguille & le fuseau, les vnes se disant desesperées, puis qu'elles apprenoient de leurs Docteurs qu'il y a des ames condamnées, qui sont dans l'impuissance du bien & ont la volonté necessitée au peché, les autres pre-

nant courage du fuiet de defefpoir,
& alleguant que Dieu les mettroit
en Paradis s'il vouloit, mais qu'el-
les n'agiroyent point pour y entrer,
puisque leurs efforts estoient tous
inutiles, I E S V S - C H R I S T n'estant
pas mort pour tout le monde.

Ie ne vous demande pas si vous
trouveriez mauuais qu'on respon-
dift à des hommes qui se feroient
hazarder à debiter ces oracles, &
d'autres de mesme force à vos
Diocesains; mais ie vous diray seu-
lement que le desordre alla croif-
fant de telle façon au grand preiu-
dice des consciences, que Mes-
sieurs du Chapitre se crurent obli-
gez d'y apporter tous les remedes
qui estoient en leur pouuoir. Ils
prirent des attestations authenti-
ques de quatorze mauuaises pro-
positions que ces Docteurs auoient
auacées, & par l'entremise de Mon-

seigneur le Duc de Chaulnes firent
 représenter à la Reyne le peril qu'il
 y auoit à laisser la liberté de parler
 à ces deux bouches qui mettoient
 par tout la dissension, tandis que le
 Theologal de la Cathedrale, hom-
 me docte & de vie très-exemplaire,
 fulmina trois mois durant en sa
 Chaire contre leurs nouuelles opi-
 nions.

Sa Maiesté assurée de la verité
 de ces remuëments, donna ordre à
 l'Intendant de la Iustice, qui pour
 lors estoit en Picardie, d'informer
 de ces deux bons personnages, &
 qu'en suite le Conseil prist con-
 noissance du faict; Cependant le
 zele des gens de bien ne pût pas se
 tenir si paresseux qu'il ne fust éclat
 de son costé; & ceux qui estoient
 dans les sentimens communs & le-
 gitimes, iugerent estre necessaire
 de s'opposer aux erreurs qui se glis-

soient dans le peuple. Quelques Religieux se signalerent en cette bonne occasion, & entre eux le Pere le Iuge de nostre Ordre, qui pour ce qu'il estoit Iesuite déchargea tous les autres opposâs de l'en- uie de leurs parties, & la dériua toute entiere dessus nous, si ce fut avec raison, soyez en iuge. Mais voicy la crise de nostre mal.

Dans les informations de l'Intendant ces nouueautez dangereuses se trouuerent entierement accrées par la deposition de personnes irreprochables; & sur ce, la Reyne & son Conseil deuëmēt instruits, ordonnerent à Labadie de fortir au plustost de la Picardie, & firent defense à Dabillon de prescher plus dans Amiens. Ce fut là nostre grand crime.

Les partisans de ces deux Illuminez se prennent à nous de cet Ar-

rest. Les Officiers de Monseigneur
crient que nous auons procuré ce
changement par nos brigues. Ils
sement de grosses paroles contre
nous pour témoigner leur aigreur,
& ne se contentant pas de nous of-
fenser par leurs discours, ils ont
recours à la plume, dernier refuge
des impuissants animez, aussi bien
que des innocens que l'on oppres-
se. Ils prennent leur occasion du
procedé tenu par Monseigneur sur
quelques Sermons du Iesuite, &
font moins vn narré veritable de ce
qui s'estoit passé, qu'un libelle tout
à faict diffamatoire & iniurieux à
nostre Corps, & aux Peres Capu-
cins. Nous eusmes pourtant assez
de force pour laisser couler cet ora-
ge en patience. Nous ne repartis-
mes point à ces iniures, & nous a-
bandonnasmes le soin de nostre
innocence au mesme Dieu qui nous

a sauuez de plus grands dangers.

Ie ne sçay si ce fut de son instinct ou autrement, qu'un Ecclesiastique du Diocèse voyant que nous ne respondions point que par un humble silence à ces petits persecuteurs, entreprit d'estre le defendeur de la verité: Mais il parut un liuret dans Amiens, qu'on sçait n'estre point sorty de la main d'un Iesuite, & en effet la tiffure & le langage le font voir assez euidentement, où il estoit respondu à l'Imprimé des Officiers de Monseigneur, & qui portoit sur le front un titre assez fâcheux à digerer, parce qu'il estoit intitulé *Declaratiō des faussetez*, &c.

Ie ne suis ny pour le liuret, ny pour l'Auther que ie ne cognois point, mais le bruit commun estoit que la verité s'estoit produite sous ce visage ridé, & d'assez petite monstre, & que ce franc Picard auoit

tout dit. Aussi comme la franchise
 trouue par tout son passe-port, ce
 cahier ne tarda point à courir par
 Amiens, & y fut distribué de main
 en main par toutes sortes de per-
 sonnes. Il tomba dans les nostres,
 car nous sommes de la ville, nos
 amis nous le donnerent, & il arri-
 ua que nos amis qui ne l'auoient
 pas veu, nous le demandant à prest,
 si par hazard nous l'auions, nous le
 donnasmes à quelques-vns à qui
 nous ne pouuions pas le refuser sans
 offenser la ciuilité. C'est là le se-
 cond attentat espouuentable dont
 nous sommes conuaincus. Voicy
 le chastiment exemplaire qu'on se
 resolut d'en prendre.

Le sieur Barboteau Official de
 Monseigneur, quoy qu'il ne pût
 ignorer l'Autheur de cette feuille
 volante, ny le grand nombre de
 personnes qui l'auoient distribuée

de tous costez ; toutefois pour ce que quelqu'un des nôtres en a donné, il s'attaque à nous, & non aux autres; il fait citer les Peres Feuquierre & le Iuge, Recteur & Predicateur du College. Nous qui cognoissons l'humeur dont il estoit poussé, & d'ailleurs qui le tenions pour Iuge incompetent, & pour partie, nous en appellons. Il passe outre, & donne un decret d'adiournement personnel, & sans avoir esgard aux appellations reiterées, qui ont, comme vous sçavez, un effect suspensif & devolutif, il ne fait pas difficulté d'ordonner qu'ils seroient pris au corps, & où ils ne pourroient l'estre, qu'ils seroient assignez à trois briebs iours. Comme il l'auoit ordonné il le fait executer par placards affichez aux portes publiques, traitant ces deux Religieux comme des hommes atteints

de diuers excés & crimes.

Vous ne lirez pas ces choses, MONSIEUR, sans presumer qu'il y a plus de promptitude que de zele de iustice, plus d'animosité que de douceur dans tout ce beau procedé. Qu'eussions-nous fait pour nous parer contre de si grandes violences? Il ne nous est pas permis de renoncer à nos priuileges, nous nous croyons exépts comme les autres Religieux. Les appellations au S. Siege sont les remedes aux oppressions, les Officiers les méprisoient & nous pour-suiuoient de viue force: Nous ne trouuâmes point de plus prompt ny de plus iuste refuge que vers le Conseil du Roy, qui s'estoit saisy de cette affaire par les informations que l'Intendant de la Iustice auoit faites en vertu de la commission de sa Maiesté. Nous eûmes

donc recours au Roy, nous luy adressasmes nos plaintes à ce qu'il luy plût d'arrester les violentes poursuites de l'Official & Promoteur de Monseigneur.

Son Conseil y eut esgard, & par son Arrest du 27. d'Octobre 1644. il renuoye les Peres Feuquiere & le Juge par deuant le S. Siege pour y proceder sur leurs appellations; il fait defenses de mettre à execution le decret de prise de corps, & de rien attenter contre les priuileges de ces Peres, & ordonne de plus que les charges & informations faites contre eux seroient apportées au Greffe dans le mois.

En execution de cet Arrest, nous nous sommes retirez vers sa Sainteté. Elle, par son Bref du 23. Decembre 1644. donne pour Commissaires Messieurs de Senlis, de Meaux, & la Vaur pour iuger

l'un d'eux, ou tous ensemble, les causes des appellations dont est question.

En vertu de ce Bref Monseigneur de Senlis donne sa commission le
 1645. 21. Feurier. Le sieur Pecoul Promoteur est assigné à la requeste du Pere Feuquiere pour comparoistre dans la quinzaine, par deuant ledit Seigneur Euesque en son Hostel de Paris; lequel sept semaines après le terme escheu a donné défaut, portant reassignation, qui sont les voyes les plus douces qu'un Commissaire du Pape pouuoit pratiquer.

Cependant les sieurs Barboteau & Pecoul n'ayant voulu obeir à l'Arrest du Conseil du Roy, ny au Bref de sa Sainteté, ny à ses Commissaires, refusent d'apporter la procedure faicte contre les deux Peres, après plusieurs comman-

dements reïterez, & voulans par ces fuites & artifices oster la connoissance de leurs violéces & mauuais traitemens exercez à l'endroit des mesmes Peres, ils interiettent appel comme d'abus au Parlement de l'exécution du Bref, & de tout ce qui s'en est ensuiuy; & pour colorer de quelque pretexte cet appel, & faire voir que les Iesuites n'ont pû recourir au Pape, en quoy ils condamnent le Conseil du Roy, qui avec cognoissance de cause les auoit renuoyez à sa Sainteté, ils supposent diuers faicts contraires au Concordat; ce qu'on pourra iustifier en temps & lieu.

Voila où nous en sommes de nostre procès, MONSIEIGNEVR. Pour combien de temps ie ne sçay pas. Il n'a pas tenu à nous que tout le differend ne soit cessé. Nous auons tenté toutes les voyes de dou-

cœur & de soumission pour rentrer
 dans les bonnes graces de vostre
 Amy, Monseigneur le Duc d'El-
 bœuf, & Monsieur l'Intendant de
 la Iustice le sçauent bien : mais le
 temps n'est pas encore venu que
 son cœur s'attendrisse dessus nous.
 Il nous fait bien paroistre les gran-
 des volonte'z qu'il a de nous ruiner,
 puisque sous son aueu ses Officiers
 produisent maintenant vn ramas
 de pieces surannées contre nous,
 où ils croient auoir ramassé de si
 fortes batteries, qu'il nous est im-
 possible d'y parer. C'est vn present
 qu'ils ont disposé trois mois durât
 pour l'Assemblée du Clergé ; & ils
 l'ont mis entre les mains de Messei-
 gneurs les Prelats, comme vne va-
 peur de foudre pour luy donner
 plus de force à nous destruire, & la
 faire lancer dessus nous avec effet.
 Mais nous ne perdons pas la con-

flance que nous auons eu tousiours
 en leur bonté, qui nous a fait sen-
 tir leur protection en tant d'autres
 rencontres plus terribles; & graces à
 Dieu nous voyons qu'ils ont moins
 de precipitation que l'Official d'A-
 miens, à improuuer nostre procedé,
 puisqu'ils veulent bien nous escou-
 ter dans nos defenses.

Je lairrois trop imparfait l'es-
 claircissement que vous desirez d'a-
 uoir, si ie ne vous representois en
 peu de mots ce que nous pouuons
 mettre en auant pour respondre à
 ce beau liure. Il vous plaira donc
 souffrir ce peu d'ennuy qu'il me re-
 ste encor à vous donner.

Si nos parties vouloient proce-
 der selon les formes iuridiques &
 raisonnables, en appellant de l'ex-
 ecution du Bref du Pape, vous m'a-
 uoüerez qu'ils deuoient establis les
 causes de leur appel avec quelque

ordre, sur des moyens veritables, & sur des raisons solides ; mais bien loin d'agir avec methode où ils ne pensoient pas trouuer leur droit, ils se sont adressez à vn compilateur, qui leur a fait vn recueil de diuers actes, qui n'ont esté d'aucun effet ny valeur, dressez par des Docteurs qui nous declaroient la guerre ouuertement, pource qu'ils ignoroient nostre conduite, nostre esprit & institut : l'un desquels actes, pour ne rien dire des autres, celuy du 1. de Decembre 1554. se trouue plein d'inuectiues & d'iniures tout à fait calomnieuses, ne seruât qu'à faire voir vne manifeste passion qui parloit sans connoissance de cause. Est-il à propos d'alleguer toutes ces choses en vn faict particulier, contre des Religieux desquels ils pretendent estre iuges ? Ne font-ils pas voir bien clairement qu'ils ne peuuent l'estre,

tant à raison de l'incompétance,
que pour se rendre nos parties,
en nous ramenant des conuices si
atroces qui deuroient estre à iamais
estouffez?

Dans le dessein où ils sont de se
pouruoir contre le Bref de sa Sain-
teté, ils font grand vacarme de ce
que les Iesuites y sont dits exempts
de la Iurisdiction de l'Ordinaire, &
suiets immédiatement au saint Sie-
ge; Et adioustent que c'est contre le
Colloque de Poissi, contre l'Arrest
du Parlement du mois de Feurier
1562. & les Lettres Patétes de Char-
les IX. du mois de Decembre 1560.
& contre l'Edict de Henry le Grand
de glorieuse memoire sur nostre ré-
tablissement.

A cela, MONSIEUR, nous
pourrions donner pour legitime ré-
ponse la seule possession en laquel-
le nous sommes pour l'exercice de

nos fonctions sans contestation aucune depuis nostre retour en France ; mais ne me contentant pas de briser là , ie veux vous esclaircir sur les faits alleguez par nos parties.

Je commenceray par le Colloque de Poissi, où il vous plaira de remarquer que lors de cette Assemblée, nostre Compagnie ne faisant que naistre, vn petit nombre seulement de Religieux fut enuoyé par saint Ignace nostre Fondateur, de Rome en France. Ces pauvres estrangers n'estoient connus de personne, ils n'auoient credit ny habitude dans le Royaume, ny habitation ny Chapelle dans Paris pour faire aucune fonction religieuse ; ils viuoient comme simples passagers, qui n'estoient pas asseurez d'auoir le mesme logis le lendemain: & en cet estat ils furent s'offrir à l'Assemblée, qui ne leur fit pas vne petite grace de

les recevoir, eux qui n'estoient pas en termes d'obliger beaucoup le public par leurs services. Il ne faut donc pas s'estonner s'il y eut tant de restrictions & de modifications pour l'exercice de leurs petits ministres. Les oppositions sont ordinaires à tous les nouveaux establissemens.

Mais après que la Compagnie eut pris quelque accroissement, & que le Concile de Trente en luy donnant son approbation l'eut fait connoître, en suite de celle du saint Siege Apostolique; Comme il n'y eut point de Souverain en toute l'estendue de l'Eglise Chrestienne qui ne tint à quelque sorte de bonheur de la recevoir dans les terres de sa domination, aussi fut-elle admise en France avecque toute faueur & benignité, sans les restrictions de l'Assemblée de Poissi, qui n'ont ia-

mais eu d'effet.

Charles IX. succedant à l'affection de Henry II. & de François II. ses predecesseurs, voyant qu'ils l'auoient incorporée au Royaume dans ses moindres commencemens, & s'estant fait mieux informer de son Institut, le trouua si vtile au bien public, qu'il continua de l'adopter pour naturelle, & de la tenir pour Françoisse lors qu'elle estoit paruenue à son estat de grandeur. Il le fit authentiquement & par ses Lettres Patentes du premier de Iuillet 1565. portant clauses expresses de nous recevoir en France, pour nous y faire iouyr de tous & chacun nos priuileges sans limitation quelconque, sur l'assurance qu'il auoit que nous n'estions point contraires aux loix & au bien de son Estat.

Ce mesme Prince aggrea l'establisement de nos Maisons Profes-

ses dans toute la France, au mois de
Feurier 1574.

Henry III. en donna la confir-
mation par ses Lettres du mois de
May 1580.

Et en suite le Grand Cardinal de
Bourbon fonda cette mesme année
la Maison Professe de saint Louys à
Paris.

Ie ne voy donc pas de quels prin-
cipes nos aduersaires ont tiré à con-
sequence, que ces Princes ont vou-
lu nous destituer de nos droits &
priuileges, puisque toutes leurs Let-
tres & leurs Edicts nous font foy
qu'ils s'en sont rendus les prote-
cteurs.

Toute la France, & quand ie di-
rois l'Europe, ie ne parlerois point
en Orateur, sçait assez iusques où
sont allez les tesmoignages que le
Roy Henry le Grand de tres-heu-
reuse memoire nous a donnez de sa

tendre & paternelle affection en nostre endroit, depuis que nous fusmes si heureux que d'estre connus de sa Maïesté. Sa maison de la Flesche, la direction de sa conscience durant sa vie, & son cœur après sa mort, dont il nous a fait des dons si precieux, sont des marques trop sensibles & trop publiques de cette cordialité, pour pouuoir estre contestées ou ignorées. Le sieur Pecoul Promoteur dans l'Officialité d'Amiens ne les estouffera pas avec l'Edict de ce Prince sur nostre restablissement, lequel il allegue dás ses Lettres d'appel, pour faire voir, pretend-il, que nous ne sommes pas exempts. Je m'estonne comme il s'ose preua-loir de cette piece, & sur quel fondement il la produit comme sa machine d'importance. Il deuroit luy suffire qu'elle soit sortie de l'Ar-senal du grand Henry, pour se persuader

suader qu'elle est incapable de nous
blesser. Vn Roy qui nous a donné
son cœur ne nous a point osté nos
Priuileges.

Et pour y respondre, M O N S E I-
G N E V R, que pouuoit faire dauan-
tage ce grand Prince, que de nous
receuoir comme il a fait par cet E-
dict conformément à la disposi-
tion du droict commun des autres
Religieux exempts? Nous a t'il plus
restraints & limitez que les autres
Ordres? Où est-ce qu'il apparroist
de cette limitation? mais où n'ap-
parroist-il pas qu'il nous a totale-
ment esgalez à tous les autres en
la iouissance de ces droicts? n'a-
t'il pas expressement déclaré ses in-
tentions sur ce suiet par son Edict
du 26. de Iuillet 1606. donnant per-
mission aux Peres de la Maison
Professe de Sainct Louys, d'exer-
cer toutes les fonctions ordinaires

& accoustumées dans leur Ordre? Et cet Edict ne fut-il pas verifié en la Cour de Parlement le 21. d'Aoust de la mesme année 1606. Pourquoy donc produire contre nous les Arrests & volontez d'un Roy, qui depuis qu'il nous eut remis en France, n'ordonna iamais rien sur nostre disposition qu'en nostre faueur & auantage?

Je m'assure, MONSIEUR, que si le sieur Pecoul auoit l'honneur de vous voir pour vous demander conseil, vous luy donneriez auis de chercher ailleurs les moyens de nostre destruction, que dans les volontez d'un Monarque qui nous a iugez vtils à son Estat, & a trouué l'inuention de nous continuer son amitié, mesmes iusqu'après sa mort. Ses cendres parlent encore pour nous, elles doivent estre venerables à nos enne-

mis, & ce peu de poussiere Royale qui nous en reste, est d'une assez grande force pour assoupir tous les bouillons de colere de ceux qui s'emportent contre nous si aisément.

Vous me direz, MONSEIGNEUR, que ie m'eschauffe en voulant calmer les autres, & que cependant ie ne dy mot du principal de l'affaire qui regarde nostre appel au Saint Siege. A Dieu ne plaise que ma plume s'oublie du respect qu'elle vous doit & à Monseigneur d'Amiës, qui n'approuve pas sàs doute l'aigreur avec laquelle ses Officiers procedent : Mais ie vous confesse qu'estant homme qui n'ay point appris dans les affaires à me payer d'autres discours que de raisons, il m'est entierement intolerable de voir des gens qui triomphent pour auoir tiré des coups perdus, & qui

font accroire aux simples qu'ils ont
 ruiné nostre droict par des moyens
 où il est si puissamment estably.
 C'est nous tenir fort peureux que
 de s'imaginer que nous tombons
 sous des canonnades sans boulet, &
 c'est se flatter soy-mesme, que de se
 donner l'honneur de la victoire en
 vn cōbat où l'on n'a rien gagné. Ne
 feroit-il pas beau voir des hommes
 qui se mettroiēt en termes de nous
 persuader que Louys XIII. de tres
 heureuse memoire, ne nous auroit
 pas ayez & maintenus en posses-
 sion de nos droits? Ce grand Prin-
 ce heritier des bontez & inclina-
 tions en nostre endroit, de son tres
 honoré Seigneur & Pere, croyoit-il
 nos priuileges contraires aux loix
 de France, quand il a voulu laisser
 à la posterité vn si magnifique mo-
 nument de sa pieté Royale, dans la
 fondation de l'Eglise dediée à saint

Louys son ayeul, en nostre Maison
 Professe ? auroit-il accordé à cet-
 te mesme Maison par ses Lettres
 Patentés du mois de Decembre,
 1641. verifiées au Parlemēt, Cham-
 bre des Comptes, & Cour des Ay-
 des, qu'elle ioüist & vlast des mes-
 mes honneurs, auantages, priuile-
 ges, franchises, exemptions & im-
 munitez dont ioüissent les autres
 Eglises & Maisons de Fondation
 des Rois ses predecesseurs? N'a-t'il
 pas faiēt voir assez clairement par
 cette grace, que son intétion estoit
 que nous fussions confirmez dans
 la pure & pleine ioüissance de nos
 priuileges? & a-t'on après cela quel-
 que raison de douter que nous
 n'ayons tousiours esté censez, &
 reputez dans le Royaume comme
 les autres Religieux exēpts? Qu'on
 cesse donc encore vne fois de tirer
 contre nous à preiudice, les Lettres

& les Edits de nos Rois, où il n'est
 parlé de nous que pour nostre esta-
 blissement & protection dans nos
 droits : Qu'on ne mette point en
 question si leurs Maiestez nous ont
 fauorisez de leurs graces, & nous
 ont receus dans celles que nous a
 faict le Sainct Siege. Nos ennemis
 ont peine à souffrir que nous soyōs
 tant aggrez & soustenus, mais sans
 offenser la charité qui commence
 par foy-mesme, nous ne pouuons
 pas renoncer à l'honneur que nous
 font nos Roys de nous aimer, pour
 contenter les degousts de ceux qui
 en grondent. Vous-mesme MON-
 S E I G N E V R, m'avez dit que de
 quitter l'un pour l'autre ce seroit
 vn trafic trop ridicule; & de vostre
 grace vous m'avez tousiours fort
 consolé dans nos persecutions, en
 me disant qu'aux gents de bien &
 d'honneur, la multitude des en-

uieux tenoit lieu de publique approbation : mais ie laisse là cette grande campagne de discours , & reuiens à nostre appel.

Sur quoy ie demande , MONSEIGNEVR , après tant de graces de nos Roys suiuiues de diuers Arrests de son Conseil , & de tous les Parlements du Royaume , ainsi que l'usage & la pratique le font voir ; si c'est vn si grád crime d'auoir appellé à Rome ? Le Conseil ne l'a pas iugé ainsi ; il nous y a renuoyez par son Arrest ; & en effect c'estoit pour euter les griefs , & les violences d'vn Official qui faisoit le Iuge , & la partie.

La Bulle de Paul III. du mois d'Octobre de l'an 1549. & autres qu'on peut faire voir , nous donnent ce droit formellement. Elles nous permettent la voye d'appel au S. Siege quand nous sommes trou-

blez dans nos exemptions. Nous auons esté contraincts de nous en seruir : Et quand il n'y auroit point de priuilege particulier, les appellations sont du droict de nature, pour euitier les iniustes oppressions; & en semblables cas vn chacun peut recourir au Superieur commun. C'est avec regret que les Peres du College d'Amiens ont employé ce remede, attendu que ceux de la Compagnie, quelque priuilege qu'ils puissent auoir, ne veulent point en vser sans vrgente necessité, qu'avec l'agreement de Messeigneurs les Prelats. Je m'asseure qu'on ne nous accusera iamais avec raison d'entreprendre rien dās leurs Dioceses que par leur ordre & permission, puisque nous faisons profession particuliere d'honorer leur dignité & Caractere, & de nous consacrer entierement à leur seruice.

Et pour vous faire voir, MON-
SEIGNEUR, le iuste suiet que nos
Peres d'Amiens ont eu d'éviter la
iurisdiction de l'Official, ie vous
supplieray tres-humblement, pour
faire fin, de considerer derechef
les causes & les motifs des pour-
suites contre ces Peres. Il est que-
stion en tout cecy de soustenir les
sieurs de Labadie & Dabillon; deux
deserteurs de Religion, deux ieu-
nes Predicateurs qui sement des
propositions dangereuses improu-
uées par le Conseil, contre lesquel-
les le Theologal de Monseigneur
a presché en sa presence durant
trois mois, & dont vous ferez tout
estonné, si vous en lisez iamais l'ex-
traict que ie vous donneray quand
il vous plaira.

Il s'agit de conseruer deux vaga-
bonds qui sont en fuite, leur con-
science ne leur permettant pas de



se produire; l'un desquels, pour vous en acheuer l'histoire, le Chef de party Labadie, après le commandement de sortir de la Prouince, estant allé en Guyenne, & ayant entrepris de prescher dans Bourg, lieu de sa naissance, distant de cinq lieuës de Bourdeaux, n'eut pas si tost publié sa nouuelle doctrine au grand scandale de tout le monde, que le Parlement de Bourdeaux, sur la plainte de Monsieur d'Advocat General deputa deux Conseillers pour aller à Bourg en informer, & sur le rapport de ces deux Commissaires, la Cour ordonna adiournement personel contre ce Predicateur; mais au lieu de comparoistre il se refugia à Bazas où il prescha l'Aduent, & troubla toute la ville: en sorte que Messieurs les Officiers & Magistrats furent contrains de faire leurs plaintes à la

Reyne & au Parlement, sur le fuiet des predications que cet opiniastre amateur des nouveautez auoit faites dedans leur ville. Et sa Maiesté le cita par lettres expressees, pendant que le Parlement decreta cōtre luy prise de corps, ce qui le contraignit de s'enfuir de tout le ressort. Il y auroit dequoy composer vn assez iuste volume des desordres publics & particuliers qu'il a causez en 4. ans, mais cet entretien seroit ennuyeux. Cependant ~~cet~~ homme est tout le fuiet de la querelle, si vous n'y voulez ioindre son Compagnon qui n'est pas d'une autre trempe, & est maintenant inuisible comme luy, n'ayant osé comparoistre deuant la Reyne comme il en auoit eu commandement.

Après tous les scandales qu'ils ont excitez, faut-il faire le procès aux Iesuites, parce qu'ils ne sont

pas de leur sentiment? Faut-il composer & debiter tant de liures contre nostre Ordre, pour ce que nous n'auons pas maintenu ces deux esprits escartez? Faut-il employer les Auocats pour fouïller iusques dans les vieux registres, & copier la remonstrance de feu Monseigneur le President de Harlay, qu'on sçait assez ne nous auoir pas cognus, ny par suite ne nous auoir pas honorez de son amitié.

Si ces procedures doiuent passer pour excés, i'en laisse le iugement à ceux qui sont moins interessez que moy. Je sçay bien que si tous vous ressembloient, M O N S E I G N E V R, elles n'auroient point d'approbateurs. Vous estes si raisonnable & si zelé pour la gloire de l'Eglise, que vous ne consentirez iamais à voir la diuision dans ses enfans, & vous trouuerez tousiours

mauvais que des hommes hono-
 rez du Sacerdoce, deschirent des
 Religieux innocents, pour s'estre
 declarez cōtraires à des prediciōs
 scandaleuses. Vous n'aimez pas les
 Apologies; c'est pourquoy ie n'en
 fais point, mais seulement ie vous
 demande pour grace que vous nous
 conseruiez l'hōneur de vostre ami-
 tié & protection; & que iugeant de
 tous ceux de mon Ordre par moy-
 mesme, vous nous croyez tous vos-
 tres-humbles & tres-obeyssans ser-
 uiteurs: & pour verifier à nos enne-
 mis, qui vous pourroient opposer
 que vous n'avez pas des gents de
 bien tout acquis dans nos person-
 nes, souffrez que ie vous donne
 pour garant de nostre probité l'un
 des plus sages de nos Rois, & que ie
 produise pour responce à la haran-
 gue de Monseigneur le President
 de Harlay celle que luy fit Henry
 le Grand.

*Du Pleix
Histoire de
France reg.
de Henry
IV. 1603.
Mathieu en
la mesme
Histoire.*

Après que le President eut finy, le Roy leuant les yeux au Ciel, & inuocquant en son cœur la grace Diuine, fit vn merueilleux effort de son beau iugement, & de son heureuse memoire, en respondant en peu de mots tous energiques à tous les chefs de la remonstrance ou inuestiue du President.

Je vous sçay bon gré (dit-il) du soin que vous auez de ma personne & de mon Estat. I'ay toutes vos conceptions en la mienne, mais vous n'aez pas la mienne aux vostres. Vous m'aez proposé des difficultez qui vous semblent grandes & considerables, & n'aez pas sceu que tout ce que vous auez dit a esté pensé & consideré par moy il y a huit ou neuf ans, & que les meilleures resolutions pour l'aduenir se tirent de la consideration des choses passées, desquelles i'ay plus de cognoissance qu'autre qui soit. On recognût à Poissy non l'ambition des Iesuites, mais la suffisance, & ie ne sçay comme vous trouuez ambitieux ceux qui refusent les dignitez & les Prelatures, & qui font vœu de n'y point aspirer. Pour les Ecclesiastiques qui se formalisent d'eux, c'est de tout temps que l'ignorance en a voulu à la science, & i'ay observé que

quand i'ay commencé à parler de les establir, deux sortes de personnes s'y opposoient particulièrement; ceux de la Religion pretendüe, & les Ecclesiastiques mal vivants: Et c'est ce qui les a fait estimer davantage. Si la Sorbonne les a condamnés, ç'a esté sans les connoistre. L'Vniuersité a occasion de les regretter, puisque par leur absence elle a esté comme deserte, & les escoliers nonobstant tous vos Arrests les ont esté chercher dedans & dehors mon Royaume: Ils attirent à eux les beaux esprits (dites-vous) & choisissent les meilleurs, & c'est dequoy ie les estime. Quand ie fais des troupes de gens de guerre, ie veux que l'on choisisse les meilleurs soldats, & désirerois de tout mon cœur, que nul n'entraist en vos Compagnies qu'il n'en fust bien digne: que par tout la vertu fust la marque, & fist la distinction des honneurs. Ils entrent comme ils peuuent, aussi font bien les autres, & suis moy-mesme entré en mon Royaume comme i'ay pû. Il faut aduoüer qu'avec leur patience & bonne vie ils viennent à bout de tout, & que le grand soin qu'ils ont de ne rien changer ny alterer de leur premiere institution les fera durer long temps.

S'ils sont obligez plus estroitement que les autres au Commandement du Pape, c'est

pour ce qui regarde la conuersion des Infidelles, & ie n'estime pas que les vœux d'obeissance qu'ils font les obligent plus, que le serment de fidelité qu'ils me feront. Mais vous ne dites pas que l'on a trouué mauvais à Rome que le Cardinal Bellarmin n'a pas donné en ses escrits autant de iurisdiction & d'autorité au Pape sur les choses temporelles, que les autres luy en donnent ordinairement. Puisque tout le monde les iuge utiles, ie les tiens nécessaires à mon Estat : Et s'ils y ont esté par tolerance, ie veux qu'ils y soient par Arrest. Dieu m'a réservé la gloire de les y reestablr par Edict. Ils sont nez en mon Royaume, & sous mon obeissance, ie ne veux pas entrer en ombrage de mes naturels sujets, & si l'on craint qu'ils communiquent mes secrets à mes ennemis, ie ne leur communiqueray que ce que ie voudray. Laissez moy conduire cette affaire, i'en ay manié d'autres bien plus difficiles, & ne pensez plus qu'à faire ce que ie vous dis & ordonne.

F I N.

